



ЎЗБЕКИСТОН РЕСПУБЛИКАСИ
ОЛИЙ ВА ЎРТА МАХСУС ТАЪЛИМ ВАЗИРИНИНГ
БУЙРУҒИ

2021 йил “28” июль

№ 281

Тошкент ш.

Олий таълим тизимида
“Коррупциясиз соҳа”
лойиҳасини амалга оширишни
ташkil этиш тўғрисида

Ўзбекистон Республикаси Президентининг 2020 йил 27 майдаги “Ўзбекистон Республикасида коррупцияга қарши курашиш тизимини янада такомиллаштириш чора-тадбирлари тўғрисида”ги ПФ-5927-сон Фармони ҳамда Ўзбекистон Республикаси Президенти Администрацияси раҳбарининг 2020 йил 4 сентябрдаги 22-2488-сонли топшириғида белгиланган Олий ва ўрта махсус таълим вазирлигида яширин иқтисодиёт ва коррупцияга қарши курашиш ҳамда унинг олдини олиш бўйича 2020-2021 йилларга мўлжалланган “Йўл харитаси”даги вазифалар ижросини таъминлаш мақсадида

Б У Ю Р А М А Н:

1. Вазирлик тизимидаги олий таълим муассасаларида Коррупцияга қарши курашиш “Комплаенс назорат” тизимини бошқариш бўлими (кейинги ўринларда - Бўлим) ташkil этилганлиги маълумот учун қабул қилинсин.

2. Олий таълим муассасасининг Коррупцияга қарши курашиш “Комплаенс назорат” тизимини бошқариш бўлими тўғрисидаги намунавий низом 1-иловага, Коррупцияга қарши курашиш бўйича талаба-ёшлар клуби фаолияти тўғрисидаги намунавий низом 2-иловага мувофиқ тасдиқлансин.

3. Вазирлик тизимидаги олий таълим муассасалари ректорлари ва директорларга:

Бўлимга ходимларни ишга қабул қилишни очиқлик ва шаффофлик тамойиллари асосида амалга ошириш;

Бўлим фаолиятини самарали ташkil этиш учун зарурий шарт-шароитлар ва жиҳозлар (мебель, телефон, компьютер, принтер, сейф ва ҳ.к) билан таъминланган алоҳида хизмат хонасини ажратиш;

тасдиқланган намунавий низомлар асосида ўзларининг низом лойиҳаларини ишлаб чиқиш ва ўрнатилган тартибда тасдиқлаш;

Бўлим негизида коррупцияга қарши курашиш бўйича талаба-ёшлар клубини ташkil қилиш;

олий таълим муассасасининг юксак маънавиятли, ҳақиқатпарвар, ҳалол ва фаол талаба-ёшларини мазкур клубга аъзо сифатида қабул қилиш ва клуб фаолиятини йўлга қўйиш бўйича зарурий чораларни кўриш вазифалари юклатилсин.

4. Белгилаб қўйилсинки, Бўлим фаолиятини ташкил қилиш, мазкур буйруқ билан тасдиқланган намунавий низомлар республика ҳудудида жойлашган хорижий олий таълим муассасалари ва уларнинг филиаллари, бошқа вазирлик ва идоралар тасарруфидаги олий таълим муассасалари ҳамда нодавлат олий таълим муассасалари учун тавсиявий характерга эга.

5. Вазирликнинг Комплаенс назорат ва коррупцияга қарши курашиш бўлими (Х.Абдурахмонов) зиммасига:

олий таълим муассасаларида коррупцияга қарши курашиш соҳасида амалга оширилаётган ишлар натижадорлигини янада ошириш мақсадида тегишли амалий чораларни кўриш;

олий таълим муассасаларида “Коррупциясиз соҳа” лойиҳасини амалга оширилишини мувофиқлаштириш ҳамда коррупцияга қарши кураш “Комплаенс назорат” тизимини жорий этиш юзасидан умумлашган маълумотларни вазир ўринбосари Р.Ҳакимовга киритиб бориш вазифалари юклатилсин.

6. Мазкур буйруқ ижросининг назоратини ўз зиммамда қолдираман.

Вазир



А.Тошқулов



Вазирликнинг 2021 йил «08» март даги
- сон буйруғига 1-илова

Олий таълим муассасасининг Коррупцияга қарши курашиш “Комплаенс назорат” тизимини бошқариш бўлими тўғрисида НАМУНАВИЙ НИЗОМ

I. Умумий қондалар

1. Мазкур Низом Коррупцияга қарши курашиш “Комплаенс назорат” тизимини бошқариш бўлимининг (кейинги ўринларда - Бўлим) мақоми, асосий вазифалари, функциялари, ҳуқуқлари жавобгарлиги, фаолиятини ташкил этиш, ходимларнинг функционал вазифалари ҳамда жавобгарлигини белгилайди.

2. Бўлим олий таълим муассасасининг таркибий бўлинмаси ҳисобланади.

3. Бўлимнинг фаолияти олий таълим муассасасида “Комплаенс назорат” тизимини бошқариш, шунингдек коррупцияга қарши курашиш фаолиятини олиб боришга йўналтирилган бўлиб, ўз ваколатлари доирасида бевосита олий таълим муассасаси ректорига бўйсунди ҳамда Олий ва ўрта махсус таълим вазирлиги (кейинги ўринларда - вазирлик)нинг Комплаенс назорат ва коррупцияга қарши курашиш бўлимига ҳисобот беради.

4. Бўлим ўз фаолиятида Ўзбекистон Республикаси Конституциясига ва қонунларига, Ўзбекистон Республикаси Олий Мажлисининг қарорларига, Ўзбекистон Республикаси Президентининг фармонлари, қарорлари ва фармойишларига, Ўзбекистон Республикаси Вазирлар Маҳкамасининг қарорлари ва фармойишларига, вазирлик буйруқларига ва Ҳайъати қарорларига, мазкур Низом, олий таълим муассасасининг ички буйруқлари, шунингдек бошқа қонун ҳужжатларига амал қилади.

5. Бўлим ўз фаолиятини олий таълим муассасасининг бошқа бўлинмалари билан ўзаро ҳамкорликда амалга оширади.

II. Бўлимнинг вазифалари ва функциялари

6. Қуйидагилар Бўлимнинг асосий вазифалари ҳисобланади:

олий таълим муассасасида коррупцияга оид ҳуқуқбузарликларни профилактика қилиш ва уларга қарши курашиш;

олий таълим тизимида “Коррупциясиз соҳа” лойиҳасини олий таълим муассасаси миқёсида амалга оширишга қаратилган чора-тадбирлар ижросини таъминлаш;

олий таълим муассасасида коррупцияга қарши кураш “Комплаенс назорат” тизимини жорий этиш ва уни амалга ошириш;

олий таълим муассасасида коррупцияга оид хавф-хатарлар юқори бўлган йўналишлар ҳамда коррупцияга оид ҳуқуқбузарликлар содир этилишининг сабаб ва шарт-шароитларини аниқлаш;

олий таълим муассасасида коррупция кўринишлари намоён бўлишига олиб келадиган тизимли муаммолар ва уларни бартараф этиш бўйича тегишли таклифларни киритган ҳолда ахборот бериб бориш;

олий таълим муассасасида коррупцияга оид ҳуқуқбузарликларнинг сабаб ва шарт-шароитларини бартараф этиш ҳамда коррупцияга қарши курашиш чораларининг самарадорлигини оширишга қаратилган дастурлар ижросини таъминлаш;

олий таълим муассасасида коррупцияга қарши курашишга йўналтирилган жамоатчилик назоратини мувофиқлаштириб бориш, шунингдек замонавий усуллар ва ахборот-коммуникация технологиялари асосида коррупцияга қарши мониторинг олиб бориш;

коррупцияга қарши курашиш ва жамоат назорати соҳасида умум эътироф этилган халқаро стандартлар ва хорижнинг ижобий тажрибасини ўрганиш ҳамда илғор жиҳатларни татбиқ этиш бўйича таклифлар ишлаб чиқиш;

олий таълим муассасасида коррупциянинг ҳолати, тенденциялари ва сабаблари ҳамда коррупцияга қарши чоралар кўришнинг самарадорлиги юзасидан социологик, илмий ва бошқа тадқиқотларни ташкил этиш ва таклифлар ишлаб чиқиш;

олий таълим муассасаси хузуридаги академик лицейнинг коррупцияга қарши курашиш йўналишидаги фаолиятини мувофиқлаштириш.

7. Бўлим ўзига юкланган вазифаларни бажариш учун қуйидаги функцияларни амалга оширади:

олий таълим муассасасида коррупцияга қарши курашишга оид қонунлар ва қонуности ҳужжатлар, шунингдек, Вазирлик Ҳайъати қарорлари ва буйруқларига риоя этилиши устидан назорат олиб боради;

коррупцияга оид ҳуқуқбузарликларнинг олдини олишга қаратилган чора-тадбирлар ва иш режаларини ишлаб чиқади, уларнинг тўлиқ, сифатли ва ўз вақтида ижро этилишини таъминлайди, белгиланган чора-тадбирларнинг амалга оширилиши аҳволини ўрганади, натижалари бўйича маълумотлар тайёрлайди;

олий таълим муассасасида “Коррупциясиз соҳа” лойиҳасини амалга оширади;

олий таълим муассасасида коррупцияга қарши курашиш бўйича чора-тадбирларни амалга оширишга қаратилган ички ҳужжатлар лойиҳаларини ишлаб чиқади ва тасдиқлаш учун ректор(директор)га киритади;

олий таълим муассасасининг ички ҳужжатларида аниқланган коррупциявий нормаларни бартараф қилиш бўйича таклифлар ишлаб чиқади;

олий таълим муассасасида коррупциявий хавф-хатарларни баҳолайди ва уларни камайтириш юзасидан чора-тадбирлар режаларини ишлаб чиқади;

олий таълим муассасасининг профессор-ўқитувчилари, бошқарув, техник, хизмат кўрсатувчи ва ўқув-ёрдамчи ходимларининг ҳатти-ҳаракатларидаги коррупциявий хавф хатарлар ва ҳуқуқбузарликлар ҳақида келиб тушадиган мурожаатлар ва аноним хабарларни кўриб чиқади ҳамда ўрнатилган тартибда чоралар кўради;

олий таълим муассасасида коррупция фактларига доир хизмат текширувларини реестрини юритиб боради;

давлат харидларини амалга оширишда манфаатлар тўқнашувини таҳлил қилишда ва контрагентларнинг ишончлилигини текширишда иштирок этади;

олий таълим муассасаси ходимлари ўртасида манфаатлар тўқнашуви мониторингини юритади ва тегишли таклифлар киритади;

олий таълим муассасасининг профессор-ўқитувчилари, бошқарув, техник, хизмат кўрсатувчи, ўқув-ёрдамчи ходимлари ўртасида мунтазам равишда профилактик суҳбатлар ташкил этиб боради;

олий таълим муассасаси фаолиятида коррупциявий ҳолатларни аниқлаш мақсадида профессор-ўқитувчилар, бошқарув, техник, хизмат кўрсатувчи, ўқув-ёрдамчи ходимлар, талабалар (магистрантлар, докторантлар, мустақил изланувчилар) ва аҳоли ўртасида сўровлар ўтказиши;

сўровлар, ижтимоий ва бошқа тадқиқотлар асосида коррупцияга қарши курашиш тарғиботи бўйича чора-тадбирлар натижалари ва таъсирини мунтазам равишда баҳолаб боради ҳамда кейинги чора-тадбирларни белгилашда баҳолаш натижаларидан фойдаланади;

профессор-ўқитувчилар, талаба-ёшлар ўртасида коррупцияга қарши курашишга қаратилган конференциялар, учрашувлар, семинарлар, танловлар ташкил этади;

олий таълим муассасасида коррупцияга қарши курашиш соҳасида қабул қилинаётган чора-тадбирларнинг самарадорлигини баҳолайди;

олий таълим муассасасида коррупцияга оид ҳуқуқбузарликлар содир этилишининг шарт-шароитлари ва сабабларини ўрганади, шунингдек уларни бартараф этиш бўйича таклифларни ишлаб чиқади;

олий таълим муассасасининг расмий веб-сайтида “Коррупцияга қарши курашиш” бўлимидаги маълумотларни мунтазам равишда янгилаб борилишини таъминлайди;

ҳар чоракда ва заруратга кўра коррупцияга қарши курашиш бўйича амалга оширилган ишлар ҳамда олий таълим муассасасидаги коррупциявий вазият ҳақида ректорга (директорга) ҳамда Олий ва ўрта махсус таълим

вазирлигининг Комплаенс назорат ва коррупцияга қарши курашиш бўлимига ҳисобот беради;

Олий ва ўрта махсус таълим вазирлигининг Комплаенс назорат ва коррупцияга қарши курашиш бўлими ҳамда коррупцияга қарши курашиш бўйича фаолиятни амалга оширувчи бошқа давлат органлари ва ташкилотлари, ота-оналар билан коррупцияга қарши курашиш соҳасида самарали ҳамкорликни йўлга қўяди;

олий таълим муассасаси ҳузуридаги академик лицейнинг коррупцияга қарши курашиш йўналишидаги фаолияти устидан назорат ўрнатади;

олий таълим муассасасида коррупцияга қарши амалга оширилган ишлар мониторингини юритади, таҳлилий материалларни раҳбариятга ҳамда вазирликка киритиб боради.

III. Бўлимнинг ҳуқуқлари ва жавобгарлиги

8. Бўлим ўзига юкланган вазифалар ва функцияларни амалга ошириш учун қуйидаги ҳуқуқларга эга:

олий таълим муассасаси ва унинг ҳузуридаги академик лицейга ишга қабул қилиш, ходимларни аттестациядан ўтказиш, талаба (магистрант, докторант, мустақил изланувчи)ларни имтиҳонлари (якуний, оралик, малакавий, якуний давлат аттестацияси, диплом ҳимояси) жараёнларини бевосита ёки видеотрансляция орқали кузатиб бориш, мазкур жараёнларда коррупциявий хавф-хатарларни аниқлаш;

олий таълим муассасасининг ҳамда унинг ҳузуридаги академик лицейнинг профессор-ўқитувчилари, бошқарув, техник, хизмат кўрсатувчи ва ўқув-ёрдамчи ходимларидан уларнинг ваколатига кирувчи масалалар юзасидан таҳлилий материаллар, хулосалар, бирламчи ва бошқа тасдиқловчи ҳужжатларни, статистик ва бошқа маълумотларни сўраш, талаб қилиш ва олиш;

хизмат мажбуриятларини бажариш доирасида олий таълим муассасаси ходимларидан зарур ёрдам сўраш ва олиш, зарур ҳолларда ишчи гуруҳлар ташкил этиш;

олий таълим муассасасининг Кенгаши мажлиси йиғилишларида иштирок этиш;

олий таълим муассасаси ректорига (директорига) комплаенс назорат ва коррупцияга қарши курашиш масалаларига оид таклифлар киритиш;

ваколати доирасида текширувлар ўтказиш, ҳужжатларни талаб қилиш, олий таълим муассасасининг профессор-ўқитувчилари, бошқарув, техник, хизмат кўрсатувчи ва ўқув-ёрдамчи ходимлари, талабалар (магистрантлар, докторантлар, мустақил изланувчилар)дан ёзма тушунтиришлар олиш,

жиноят аломатлари аниқланган ҳолларда тегишли ҳуқуқни муҳофаза қилувчи органларга хабар бериш;

ўз фаолияти доирасида олий таълим муассасасининг таркибий бўлинмаларига кўрсатмалар ва тавсиялар бериш;

Бўлим қонун ҳужжатларига мувофиқ бошқа ҳуқуқларга ҳам эга бўлиши мумкин.

9. Бўлим:

ўзига юкланган вазифаларнинг тегишли даражада ва самарали бажарилиши;

ўзига юкланган функцияларнинг бажарилиши ҳамда ижро интизомини таъминлаш талабларини бажарилиши;

олий таълим муассасаси раҳбариятига ахборот бериш учун материаллар ва ҳужжатларнинг белгиланган муддатларда бажарилишини таъминланиши;

олий таълим муассасасида комплаенс назорат ва коррупцияга қарши курашиш фаолияти бўйича амалга оширилаётган ишлар ҳолати;

жисмоний ва юридик шахслар мурожаатларининг ўз вақтида кўриб чиқилиши ҳамда қонунчилик ҳужжатлари асосида ҳал этилиши учун жавоб беради.

IV. Бўлим тузилмаси

10. Бўлим тузилмаси Бўлим бошлиғи ва бош мутахассисни ўз ичига олади.

11. Бўлимга бошлиқ раҳбарлик қилади. Бўлим фаолияти мустақиллигини таъминлаш мақсадида Бўлим бошлиғи ўз фаолиятида бевосита олий таълим муассасаси ректори (директори)га ва Бўлим бош мутахассиси Бўлим бошлиғига бўйсунди.

12. Бўлим бошлиғи олий таълим муассасасининг бўйсунувидаги вазирлик ва идоралар билан келишилган ҳолда олий таълим муассасаси ректорининг буйруғига мувофиқ белгиланган тартибда лавозимга тайинланади ва лавозимидан озод этилади.

13. Бўлимнинг бош мутахассиси олий таълим муассасаси ректорининг буйруғи билан белгиланган тартибда лавозимга тайинланади ва лавозимидан озод этилади.

V. Бўлим бошлиғи ва бош мутахассиснинг асосий функционал вазифалари

14. Бўлим бошлиғининг асосий функционал вазифалари қуйидагилардан иборат:

Бўлимга умумий раҳбарлик қилади, бўлим ишини ташкил этади, бўлимга юкланган вазифалар ва функцияларнинг бажарилиши ҳамда ижро интизоми бўйича тўлиқ жавоб беради;

олий таълим муассасасида коррупцияга қарши курашишга оид қонунлар, қонуности ҳужжатларига риоя этилиши устидан назорат олиб боради;

коррупцияга оид ҳуқуқбузарликларнинг олдини олишга қаратилган чора-тадбирлар ва иш режаларини ишлаб чиқади, уларнинг тўлиқ, сифатли ва ўз вақтида ижро этилишини таъминлайди;

олий таълим муассасасида “Коррупциясиз соҳа” лойиҳасини амалга оширишга қаратилган ишларни ташкил этади;

илғор хорижий тажрибаларни ўрганиш асосида коррупцияга қарши курашиш бўйича таҳлилий материаллар тайёрлайди;

фуқаролик жамияти институтлари, ҳуқуқни муҳофаза қилувчи ва назорат қилувчи органлар, ота-оналар билан коррупцияга қарши курашиш соҳасида самарали ҳамкорликни йўлга қўяди;

комплаенс назорат ва коррупцияга қарши курашишга масъул шахсларни ўқитиш ва малакасини оширишни ташкил этади;

олий таълим муассасасида коррупцияга йўл қўймаслик юзасидан амалга оширилган ишлар мониторингини юритади, таҳлилий материалларни раҳбариятга киритади;

бўлим фаолиятига тааллуқли масалалар бўйича ҳужжатларни ишлаб чиқади, шунингдек, киритилган ҳужжатлар лойиҳалари кўриб чиқилишини таъминлайди ва таклифлар тайёрлайди;

олий таълим муассасаси Кенгаши таркибига киритилади ҳамда мажлисларда иштирок этади;

бўлим ишларини янада такомиллаштиришга оид чора-тадбирларни ишлаб чиқади ва амалга оширилишини таъминлайди;

бўлим фаолияти билан боғлиқ жисмоний ва юридик шахсларнинг мурожаатларини кўриб чиқади ҳамда ижро интизомига тўлиқ амал қилади;

қонун ҳужжатларига мувофиқ ваколати доирасида бошқа функционал вазифаларни амалга оширади.

15. Бош мутахассиснинг асосий функционал вазифалари қуйидагилардан иборат:

олий таълим муассасалари педагог ходимлари, талаба ёшлар ҳамда жисмоний ва юридик шахслар билан учрашувлар ташкил этиб, уларни қийнаётган тизимли муаммоларни ўрганади, олий таълим муассасасида коррупцияга оид хавф-хатарлар юқори бўлган йўналишлар ҳамда коррупцияга оид ҳуқуқбузарликлар содир этилишининг сабаб ва шарт-шароитларини аниқлайди;

коррупцияга қарши курашиш борасида ўтказиладиган ўрганишлар, текширишлар, таҳлиллар ҳамда ишлаб чиқиладиган таклифларда мутахассисларни жалб этишда иштирок этади;

коррупцияга қарши ўқув-услубий ва методик жиҳатдан, жумладан аудио-видео роликлар, фото ҳамда буклет ва брошюра каби материалларни яратишни йўлга қўяди;

олий таълим муассасаларида коррупциянинг ҳолати, тенденциялари ва сабаблари ҳамда коррупцияга қарши чоралар кўришнинг самарадорлиги юзасидан социологик, илмий ва бошқа сўровларни ташкил этади;

Бўлим бошлиғи бўлмаганда, бош мутахассис фаолиятни мувофиқлаштириб боради;

қонунчилик ҳужжатларига мувофиқ ваколати доирасида бошқа функционал вазифаларни амалга оширади.

VI. Бўлим фаолиятини ташкил этиш

16. Бўлим ўз фаолиятида соҳага доир қонун ҳужжатлари, тегишли вазирлик ва идоралар буйруқлари, Ҳайъат қарорлари, олий таълим муассасаси Кенгаши қарорлари, буйруқлари, мазкур Низом ва Бўлимнинг иш режаси асосида амалга оширади.

17. Олий таълим муассасасининг Кенгаш қарорлари, ректор буйруқлари ва тендер ҳужжатлари Бўлим билан мажбурий тартибда келишилади.

18. Бўлимнинг иш режаси олий таълим муассасаси иш режаси таркибий қисми ҳисобланади ҳамда олий таълим муассасаси ректори (директори) томонидан тасдиқланади.

VII. Яқуний қоида

19. Бўлим фаолиятини қайта ташкил этиш ва тугатиш қонун ҳужжатларида белгиланган тартибда амалга оширилади.



Олий таълим муассасасининг коррупцияга қарши курашиш бўйича талаба-ёшлар клуби НАМУНАВИЙ НИЗОМИ

I. Умумий қондалар

1. Олий таълим муассасасининг коррупцияга қарши курашиш бўйича талаба-ёшлар клуби (кейинги ўринларда - Клуб) Ўзбекистон Республикасининг Конституцияси, “Таълим тўғрисида”ги Қонуни, Ўзбекистон Республикаси Президентининг 2019 йил 27 майдаги “Ўзбекистон Республикасида коррупцияга қарши курашиш тизимини янада такомиллаштириш чора-тадбирлари тўғрисида”ги ПФ-5719-сон Фармони, Ўзбекистон Республикаси Президентининг 2019 йил 9 январдаги “Жамиятда ҳуқуқий онг ва ҳуқуқий маданиятни юксалтириш тизимини тубдан такомиллаштириш тўғрисида”ги ПФ-5618-сонли Фармони, Ўзбекистон Республикаси Олий ва ўрта махсус таълим вазирлигининг 2021 йил 5 мартдаги 120-сонли буйруғи, ОТМ Кенгашининг 2021 йил __даги йиғилиш қарорига асосан ташкил этилади ва ўз фаолиятини мазкур Низомга асосан олиб боради.

2. Клубнинг асосий мақсади олий таълим муассасаси профессор-ўқитувчилари, ходимлари, талаба-ёшларида коррупцияга нисбатан муросасиз муносабатни ва коррупцияга қарши ижтимоий-психологик иммунитетни шакллантириш, коррупцияга қарши курашиш жараёнида жамоатчилик назоратини йўлга қўйишдан иборат.

3. Клубнинг асосий вазифалари:

-тарғибот-ташвиқот ишлари орқали профессор-ўқитувчилар, ходимлар ва талаба-ёшлар ўртасида коррупциянинг ҳар қандай кўринишларига нисбатан ноль даражадаги тоқатсизликни шакллантириш;

- олий таълим муассасалари профессор-ўқитувчилари ва ходимларини фаолиятини олиб боришда шаффофликни таъминлаш ҳамда мазкур жараёнларда жамоатчилик назоратини ўрнатиш;

- олий таълим муассасасида коррупцияга қарши курашиш соҳаси бўйича олиб борилаётган ишларда талаба-ёшларнинг фаол иштирокини таъминлаш;

- жамоат ва сиёсий ҳаётнинг барча соҳаларида, биринчи навбатда, таълим тизимида коррупцияни олдини олиш бўйича аниқ таклифларни ишлаб чиқишда фаол қатнашиш;

- олий таълим муассасасида талаба-ёшлар иштирокида коррупциянинг мазмун-моҳияти, унинг келиб чиқиш сабаблари ҳамда унга қарши курашиш бўйича давра суҳбатлари, флешмоблар ва бошқа тадбирлар ташкил этиш.

4. Клуб фаолияти ихтиёрийлик, мустақиллик, қонунийлик, объективлик, коллегиялик ва ошкоралик тамойилларига асосан ташкил қилинади.

II. Клуб тузилмаси ва ташкилий масалалар

5. Клуб Ўзбекистон Республикаси қонунларига асосан олий таълим муассасаси қошида жамоатчилик асосида ташкил этилади.

6. Клуб фаолиятига умумий раҳбарлик олий таълим муассасаси Коррупцияга қарши кураш “Комплаенс назорат” тизимини бошқариш бўлими (кейинги ўринларда – Бўлим) томонидан амалга оширилади ҳамда Клуб Бўлим олдида ҳисобдор саналади.

7. Клуб алоҳида эмблемаси (логотипига)га эга бўлади.

8. Бўлим томонидан Клуб фаолиятида иштирок этувчилар рўйхати факультет деканлари тавсиясига асосан оғзаки сўров асосида шакллантирилади.

9. Бўлим тақдим этилган рўйхатда келтирилган талабалар билан умумий танишув суҳбати ўтказилади. Суҳбат давомида талабаларнинг билим даражаси ва дунёқараши баҳоланади.

10. Суҳбат натижаси бўйича талабаларни Клубга аъзолигига қабул қилиш Бўлим томонидан тузиб имзоланган якуний рўйхат асосида амалга оширилади.

11. Клуб аъзоларининг фаолияти бир нечта секторларга бўлинган тартибда амалга оширилади.

12. Клуб аъзолари фаолиятини тўғри ташкил этиш ва мувофиқлаштириб бориш мақсадида Бўлим томонидан ҳар бир секторга олий таълим муассасаси вакили - сектор раҳбари ҳамда аъзолар орасидан сектор етакчиси рўйхати шакллантирилади.

15. Клуб иш режасида амалга ошириладиган чора-тадбирлар, уларни ўтказишдан мақсад, саналар, қатнашувчилар, масъул шахслар ва амалий натижалар акс эттирилади, мазкур режа ҳар ўқув йилининг бошида Бўлим томонидан тасдиқланиб, уни амалга оширилиши тизимли равишда назорат қилинади.

16. Клуб иш режасида аъзоларнинг умумий йиғилиши, коррупцияга қарши курашиш мавзусига бағишланган эсселар танлови ва флешмоблар, учрашувлар, илмий семинарлар, коррупцияга қарши кураш бўйича соҳа мутахассислари ва таниқли шахслар иштирокида учрашувларни ўтказиш каби тадбирлар акс эттирилади.

17. Клуб аъзолари қонун устуворлигини таъминлай оладиган, ватанпарвар, коррупцияга қарши курашишда фидоий, жонкуяр, одоб-ахлоқи бўйича намунали бўлиши керак.

18. Клуб иш режаси ва ҳисоботлари Бўлим бошлиғи томонидан тасдиқланади.

19. Клуб аъзоларига қонун ҳужжатлари асосида тақиқланган ҳаракатларни амалга ошириш ҳамда фаолияти давомида хизматга доир ва бошқа маълумотларни ошкор этиш катъий тақиқланади.

20. Клуб аъзолари қуйидаги ҳуқуқларга эга:

клуб фаолияти ҳақида маълумотга эга бўлиш;

клуб доирасида ташкил этиладиган танловлар ва тадбирларда қатнашиш.

Клуб аъзолари фаолиятдан келиб чиқиб бошқа ҳуқуқларга ҳам эга бўлиши мумкин.

21. Клуб аъзоси қуйидаги мажбуриятларга эга:

олий таълим муассасасидаги ўқув жараёнларига салбий таъсир кўрсатмаган ҳолда Клуб доирасидаги тадбирларда қатнашишга;

Бўлим бошлиғининг, Клуб сектори раҳбари ва етакчисининг Клуб фаолиятга оид қонуний кўрсатмаларини бажаришга.

22. Талабалар қуйидаги асосларга кўра клуб аъзолигидан чиқарилади:

ўз хоҳишига кўра берган аризасига асосан;

олий таълим муассасасини тугатганда;

талабалар сафидан четлаштирилганда ва академик таътил олганда;

хизматга доир ва бошқа маълумотларни ошкор этганда;

соғлиғи имкон бермаганда;

жиноий жавобгарликка тортилганда;

қонунчиликда белгиланган бошқа ҳолларда.

23. Талабани клуб аъзолигидан чиқариш ҳақида сектор раҳбари Бўлимга билдирги билан мурожаат қилади. Билдирги асосида талаба клуб аъзолари рўйхатидан чиқарилади.

24. Талабани клуб аъзолигидан чиқаришга асос бўлган ҳолатларнинг бартараф этилганлиги (соғлиғи тикланганда, талабалар сафига тикланганда, клуб аъзолигига қабул қилиш ҳақида мурожаат этганда ва бошқалар) уни клуб аъзолигига қабул қилиш учун асос бўлади.

25. Мазкур Низом талабларини бузганлиги учун клуб аъзолигидан чиқарилган талаба камида олти ой ўтгач, клубга такроран қабул қилиниши мумкин.

III. Яқуний қоидалар

26. Клуб аъзоларининг клуб доирасидаги фаолияти уларни олий таълим муассасаларидаги таълим жараёни доирасидаги мажбуриятлардан озод этмайди.

27. Олий таълим муассасаларида клуб аъзоларининг маълумотномаси (объективка) юритилади.

28. Талабаларнинг клубдаги фаолияти олий таълим муассасаси томонидан рағбатлантирилиши мумкин.

29. Клуб фаолиятини тугатиш ва қайта ташкил этиш олий таълим муассасаси Кенгаши қарори асосида амалга оширилади.